

**Date – 18/04/2026**

**Time - 7:30 -7:40 Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (MORNING)**

1. Chief Minister Pu Lalduhoma'n Aizawl khawpui changkang leh mawi zawk siam turin sawrkarin hma a la mek tih a sawi.
2. Ram puma nu leh naute tana chaw tha ei pawimawhzia inhrilhhriatna Poshan Pakhwada 2026 chu Mizoram hmun hrang hrangah neih a ni.
3. State Election Commissioner Dr. H. Lalthlangliana'n Aizawl Municipal Corporation inthlan 2026 atan ruahmanna leh inbuatsaihna peihfel a ni tawh a ti.
4. Ram danpui siamthat vawi 131 na tur bill Constitution (131st Amendment) Bill 2026, hmeichhiate tana Lok Sabha leh Legislative Assembly-a seat hauhsakna tur chuan nizan khan Lok Sabha a paltlang zo lo.

<><><>

**CM**

Chief Minister Pu Lalduhoma'n Aizawl khawpui changkang leh mawi zawk siam turin sawrkarin hma a la mek tih a sawi.

Pu Lalduhoma hian Social media kaltlangin he thu hi a sawi a, Aizawl khawpui chu khawpui him zawk, changkang zawk leh mawi zawka siam turin kawng tam takin sorkar chuan hma a la mek tih sawiin kawlphehtha, Tui hnianghnar zawk an neihna tur leh khualzin hipna lam te, inkalpawhna tha zawk leh tam zawk atan te hmalakna tam tak kalpui mek a ni a ti a, Aizawlin hma a sawn zel theih nan mipuite thawhpaina tha an mamawh thu a sawi a ni.

<><><>

**GOVERNOR**

Larsap General (Retd) Vijay Kumar Singh an rualkhai taka hmasawna kalpui turin ram dang leh state thenawmte nena inrinaah hmasawna ruhrel siam ngaih pawimawh a tul a ti.

Nimina Mamit Aspirational District-a Silsury khua tana hman tur Ambulance, NBCC (India) Ltd., CSR Fund kaltlanga lei a vailiamnaah thusawiin Larsap chuan ramri hrula khuate chu ngaihven zual a ngai a, anih loh chuan mipuite bawkin an tuar thin a ni, a ti a. Sawrkar laipuiin district hnufual 'Aspirational District' te a ngaih pawimawh thu sawiin, NBCC-te chu ramria hmasawnaa ruhrel thawk nasa an nih avangin, ramri depa chengte mamawh leh hmasawnaa turte ngaipawimawh zel turin a chah nghal bawk.

NBCC (India) Ltd., hi 1960 ah din niin, Sawrkar laipui hnuai hmasawnaa ruhrel lian tak takte an thawk thin a, Mizoramah chuan India leh Bangladesh ramri hung hna thawkin, thawh tur bituk an pek 189 km atangin 98 km an zo fel tawh a, hmabak dang awmte Lawngtlai District-ah an thawk mek a. Tunhnai khan Mamit District chhung Dampa Tiger Reserve Forest area-a ramri hung hna an zawh fel tawh 55 km a thui leh Border Outpost (BOP) 5 te chu a enkawl tur hnenah an hlan fel tawh a ni.



### **CYMA PRESIDENT**

Central YMA President Pu R. Lalnggheta'n ruihhlo avanga hausate chu YMA-a nihna pawimawh pe lo tur leh an sum it lo turin a chah.

Aizawl Electric Veng Branch YMA-in nizana YMA kumpuan 'Ruihhlo Do' hawna inkhawm an buatsaih a hmanpuinaah Central YMA President, Pu R. Lalnggheta chuan, YMA Kumpuan thupui 'Ruihhlo Do' chu Pathian duh dan a nih anga Pathianrawn chungabeihpui thlak a nih tur thu a sawi a, Ruihhlo avanga hausate chu YMA-a nihna pawimawh pe lo tur leh an sum it lo turin a ngen a. Mizo hnam tichhetu ruihhlo zuarte lakah indo an puang tawh a, an dim tur a ni lo tih a sawi.



### **POSHAN PAKHWADA**

Ram puma nu leh naute tana chaw tha ei pawimawhzia inhrilhhriatna Poshan Pakhwada 2026 chu Mizoram hmun hrang hrangah neih a ni.

Nimin khan 'State Consultation Meet on Maternal Health, Child Health & Early Childhood Stimulation' neih a ni a. He hun hi Women & Child Development buatsaih niin Aijal Club-ah hman a ni a. Women & Child Development Director Pi Zoramthangi Chhangte chuan, Poshan Pakhwada a lo pian hnuah hmasawnaa a kal nasa tih a sawi a, nau buk dan pawh tunah chuan an san zawngte buk niin an rih zawng ringawt ni loin an sei zawng leh an san zawng te nen an inmil em tiin BMI te endik vek a ni tawh a ti a. Anganwadi hnathawkte pawhin Delhi atanga an lo endik theih turin hna an thawk vek tawh tih sawiin, khawl thil thenkhatah harsatna te chu lo awm ve thin mah se hma lam an pan zel tih sawiin, naute in eitur tha a ei theih nan pawh hmalak zel a ni tih a sawi bawk.

Nimina hun hmanah hian Health & Family Welfare Department, AYUSH, DIET, MZU (Psychology Dept & Dept of Clinical Psychology), Child Guidance Centre & Women & Child Development-te an kal khawm a, Maternal Health lama hmasawnaa tur leh hmalak ngaihna te, Naupang hriselna, Early Stimulation leh

Screen en tam, phone khawih tam chungchanga hmasawna leh a enkawl dan zirho a ni.

Khawzawlah chuan ICDS Project chuan Electric veng YMA Hall-ah nausen thla 6 atanga kumkhat inkar inbawhvahsiakna leh ECCE Festival hmangin ECCE pawimawhna hrang hrang an sawi a, Anganwadi-ah naupangte chu School kal turin zirtir a, kaihhruai thin an ni a, naupangte Anganwadi nuam an tih theihna tura naupangte kaihhruai a, enkawl thiam an pawimawh tih a sawi.

ECCE Festival-ah Anganwadi Centre 28 atangin Worker ten naupangte zirtirna tura an thil siam hrang hrangte an entir a ni.



## **SEC PRESS STATEMENT**

State Election Commissioner Dr. H. Lalthlangliana'n Aizawl Municipal Corporation inthlan 2026 atan ruahmanna leh inbuatsaihna peihfel a ni tawh a ti.

Dr. H. Lalthlangliana chuan thudik ziktluak lo leh tawngkam uchuak, mi rilru tina thei ang chi a Vote zawng lo turin Political Party hrang hrang te a ngen a, Political Party hrang hrang ten mipui Vote an zawn na ah thudik ziktluak lo finfiah mai theih si loh te, mi rilru tina thei tawngkam mawilo leh mimal inbeihnate campaign na hmun hrang hrang Media leh Social Media ah a awm zeuh zeuh thin tih hriat a ni a ti a, hetiang laka inthiarfihlim tura an Party Worker theuh te thunun ni se a ti a, hemi chungchangah hian Mizoram People Forum hruaitute puihbawmna a ngen bawk.

Dr Lalthlangliana chuan naktuk tlai dar 5-a Campaign tawp hun Silent Period chu voter ten rilru fim tak hmanga ngaihtuahna an sen theih na tur atana tih a ni a ti a. Silent Period chhunga campaign chu voter te zahlohna anih thu sawiin Political Party hrang hrang te chu hemi laka insum turin a ngen bawk a ni.

State Election Commissioner Dr Lalthlangliana ho hian nimin khan Political Party hrang hrang hruaitute bakah Mizoram People Forum hruaitute, DC, Aizawl, SP, Aizawl leh Official pawimawh dangte an tel a, vote thlak ni atan venhimna pawh uluk taka kalpui a ni dawn tih sawiin ruahman dan chuan April ni 21-ah Police 657 an Duty dawn a, engkim tluang taka a kal theih ngei a beisei thu a sawi a ni.

Dr Lalthlangliana sawi danin, Model Code of Conduct (MCC) bawhchhiatna chungchangah complain pahnih a lut tawh a, chung thuah chuan nimin tlai dar 4 thleng khan insawifiahna hun pek an ni a, hemi chungchanga thutlukna naktuk hian hriat theih a nih a rin thu a sawi.



## **MOCK DRILL**

Govt. Aizawl North College-ah Disaster Awareness & Mock Drill buatsaih a ni.

Chhiatrupna lo thlen thulha chet lak dan tur zirhona leh a taka tih chhinna hun hi khan Red Cross Society & Disaster Management Committee, Govt Aizawl North

College leh Aizawl District Disaster Response Management Authority (ADDMA) tangkawp in nimin khan buatsaih a ni a. He hunah hian lirnghing leh chhiatna dang lo thlen thut huna College zirlaite leh thawktute chet lak dan tur te, Building atanga tlanhhuaha hmun him lam pan dan tur te, thi leh hliamte chhanchhuah dan leh bawihawm dan te an inzirtir a ni.

<><><>

#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

#### **CONSTITUTION AMENDMENT BILL TO IMPLEMENT WOMEN'S RESERVATION FAILS IN LOK SABHA**

Ram danpui siamthat vawi 131 na tur bill Constitution (131st Amendment) Bill 2026, hmeichhiate tana Lok Sabha leh Legislative Assembly-a seat hauhsakna tur chuan nizan khan Lok Sabha a paltlang zo lo. He bill hian tlang turin member inkhawm zawng zawng zat 528 atanga hmun thuma thena hmun hnih 352 a mamawh a. Bill sawiho anih hnuah vote lak niin MP 298 in an thlawp lain 230 in an thlawp lo thung a. Lok Sabha Speaker Om Birla chuan vote result hi puangin he bill hian a mamawh tawk thlawptu a neihloh avangin a kal zel thei lo tih a puang a ni.

Hemi hnu hian Parliamentary Affairs Minister Kiren Rijiju chuan bil dang pahnih Lok Sabha leh State Assembly seat tihpunna tur Delimitation Bill, 2026 leh Union Territories Laws (Amendment) Bill, 2026 te chu Constitution (131st Amendment) Bill,2026 nena inkungkaih anih avangin vote la loin an hnuk kir leh tih a puang bawh a ni.

<><><>

#### **STRAIT OF HORMUZ OPEN**

Iran chuan inkahhai puan chhungin zalen taka Strait of Hormuz paltlang theih turin a hawng. Social Media lamah Iran Foreign Minister Abbas Araghchi chuan Strait of Hormuz-a sumdawng lawng lian zawng zawngte tan kawng hawn a ni ta a ti. Israel leh Lebanon ten inkahhai an puan hnuah helai hmun pawimawh hi hawn a ni a ti.

Strati of Hormuz hawn anih hnu hian tuialththei man chu khawvel pumah zaa 11 in a tlahniam nghal a ni.

<><><>